

საქართველოს ეროვნული ბანკი განმეორებით აცხადებს კონკურსს საქართველოს დემოკრატიული რესპუბლიკის პირველი კონსტიტუციის მიღებიდან 100 წლისთავისადმი მიძღვნილი საკოლექციო დანიშნულების 5 ლარის ნომინალის მონეტის დიზაინის ესკიზის შესარჩევად

გ ა ნ ც ხ ა დ ე ბ ა

საქართველოს დემოკრატიული რესპუბლიკის პირველი კონსტიტუციის მიღებიდან 100 წლისთავისადმი მიძღვნილი საკოლექციო დანიშნულების 5 ლარის ნომინალის მონეტების დიზაინის ესკიზების შესარჩევი ახალი კონკურსის შესახებ

განმცხადებელი:

საქართველოს ეროვნული ბანკი, მისამართი: თბილისი, სანაპიროს ქ. N2. ტელ: (+995 32) 2 406 359/471, ცხელი ხაზი: (995 32) 2 406 406 ელფოსტა: coindesign@nbg.gov.ge ვებ-გვერდი: www.nbg.gov.ge

კონკურსის მიზანი:

1921 წლის 21 თებერვალს, საქართველოს დამფუძნებელი კრების მიერ მიღებული იქნა საქართველოს დემოკრატიული რესპუბლიკის კონსტიტუცია, რომელიც წარმოადგენდა საქართველოს დემოკრატიული რესპუბლიკის ძირითად კანონს.

საქართველოს დემოკრატიული რესპუბლიკის კონსტიტუციით აღიარებულ იქნა, რომ საქართველო არის თავისუფალი, დამოუკიდებელი და განუყოფელი სახელმწიფო, მუდმივი და უცვლელი ფორმა პოლიტიკური წყობილებისა არის დემოკრატიული რესპუბლიკა; საქართველოს დედაქალაქი არის ტფილისი, სახელმწიფო ენა - ქართული; საქართველოს დემოკრატიული რესპუბლიკის მართვა-გამგეობის ფორმის გაუქმება არ შეიძლება გახდეს კონსტიტუციის გადასინჯვის წინადადების საგანი. 1921 წლის კონსტიტუცია გამოირჩევა ადამიანის უფლებებისა და თავისუფლებების განმტკიცებით. კონსტიტუცია აცხადებს კანონის წინაშე მოქალაქეთა თანასწორობას და კრძალავს წოდებრივ განსხვავებებს. ორივე სქესის მოქალაქე თანასწორია, როგორც პოლიტიკური, ისე სამოქალაქო, ეკონომიკური და საოჯახო უფლებით. გარდა მოქალაქეთა უფლებებისა, კონსტიტუცია აღიარებს ეროვნულ უმცირესობათა უფლებებს. ამ კონსტიტუციით იკრძალება საქართველოს რესპუბლიკის რომელიმე ეროვნული უმცირესობის თავისუფალი სოციალურ-ეკონომიკური და კულტურული განვითარების, განსაკუთრებით, მისი დედაენით სწავლა-აღზრდის და ეროვნულ-კულტურულ საქმეთა შინაური მართვა-გამგეობის შეზღუდვა.

1921 წლის კონსტიტუციის ტექსტი ერთ-ერთი პროგრესული იყო ევროპის კონტინენტზე. უკვე მაშინ აღიარებდა იგი ისეთ ღირებულებებს, როგორცაა თავისუფლება, დემოკრატია და სამართლებრივი სახელმწიფო, რომელსაც დღევანდელი ევროპა ეყრდნობა.

საქართველოს დემოკრატიული რესპუბლიკის კონსტიტუციამ მნიშვნელოვანი როლი ითამაშა საქართველოს კონსტიტუციონალიზმის ისტორიისა და საქართველოს სახელმწიფოებრიობის განვითარებაში. 1995 წელს მიღებული კონსტიტუცია დაეყრდნო 1921 წლის კონსტიტუციის ძირითად პრინციპებს.

აღნიშნული მოვლენის მნიშვნელობის გათვალისწინებით, საქართველოს ეროვნულმა ბანკმა გადაწყვიტა, გამოუშვას საკოლექციო დანიშნულების 5 ლარის ნომინალის ვერცხლის მონეტა საქართველოს დემოკრატიული რესპუბლიკის პირველი კონსტიტუციის მიღებიდან 100 წლისთავის აღსანიშნავად და ამ მიზნით შესაბამისი ესკიზების შესარჩევად გამოაცხადოს ახალი კონკურსი.

კონკურსში მონაწილეობის მსურველებმა ესკიზები უნდა წარმოადგინონ თანდართული პირობების მიხედვით.

კონკურსის ტიპი:

ღია კონკურსი

კონკურსში მონაწილეობის მიღება შეუძლია ნებისმიერ მსურველს - როგორც ფიზიკურ (რეზიდენტი/არარეზიდენტი), ასევე იურიდიულ (რეზიდენტი/არარეზიდენტი) პირს, რომელიც აკმაყოფილებს ქვემოთ მოცემულ საკონკურსო პირობებს და წარმოადგენს დიზაინის ესკიზებს დადგენილ ვადებში, გარდა შესაბამისი დიზაინის ესკიზების შესარჩევად საქართველოს ეროვნულ ბანკში შექმნილი კომისიის წევრებისა და საქართველოს ეროვნული ბანკის თანამშრომლებისა.

განცხადების გამოქვეყნების თარიღი: **2020 წლის 6 აგვისტო.**

სამართლებრივი საფუძვლები:

- ✓ „საქართველოს ეროვნული ბანკის შესახებ“ საქართველოს ორგანული კანონი;
- ✓ საქართველოს ეროვნული ბანკის საბჭოს 2010 წლის 10 ივნისის N5 დადგენილებით დამტკიცებული „ლარის ბანკნოტებისა და მონეტების დამზადების წესი“;
- ✓ საქართველოს ეროვნული ბანკის საბჭოს 2011 წლის 7 თებერვლის N5 განკარგულებით დამტკიცებული „ლარის ბანკნოტებისა და მონეტების დამზადების შესყიდვის წესი“;
- ✓ საქართველოს ეროვნული ბანკის საბჭოს 2020 წლის 3 აგვისტოს N19 განკარგულება საქართველოს დემოკრატიული რესპუბლიკის პირველი კონსტიტუციის მიღების 100 წლისთავისა და დედამიწის დღისადმი მიძღვნილი საკოლექციო დანიშნულების მონეტების დიზაინის ესკიზების შესარჩევად ახალი კონკურსის ჩატარების თაობაზე“;
- ✓ საქართველოს ეროვნული ბანკის პრეზიდენტის 2019 წლის 13 სექტემბრის N166/04 ბრძანებით შექმნილი „ლარის ბანკნოტებისა და მონეტების დიზაინის ესკიზების შერჩევის“ კომისიის 2020 წლის 5 აგვისტოს N9 ოქმი.

**საქართველოს დემოკრატიული რესპუბლიკის პირველი კონსტიტუციის მიღების
100 წლისთავისადმი მიძღვნილი საკოლექციო დანიშნულების 5 ლარის ნომინალის
მონეტების დიზაინის ესკიზების შესარჩევი კონკურსის პირობები**

მუხლი 1. საკონკურსო პროექტის აღწერილობა:

კონკურსანტს მოეთხოვება მონეტის დიზაინის ესკიზების მომზადება-წარმოდგენისას გაითვალისწინოს შემდეგი პირობები:

1. მონეტის მახასიათებლები: ნომინალი - 5 ლარი; შემადგენლობა - ვერცხლი ; დიამეტრი - 33 მმ; ხარისხი - პრუფი.
2. თემა: **საქართველოს დემოკრატიული რესპუბლიკის პირველი კონსტიტუციის მიღების 100 წლისთავი**
3. დანიშნულება - საკოლექციო.
4. მხატვრული შესრულების მოთხოვნები:
 - 4.1. დიზაინი უნდა შეიცავდეს შემდეგ სავალდებულო ელემენტებს:
 - 4.1.1. ვალუტის დასახელებას ქართულ ენაზე და ნომინალურ ღირებულებას „5 ლარი“; ემიტენტი ქვეყნის დასახელებას ქართულ და ინგლისურ ენებზე - „საქართველო“, „Georgia“; გამოშვების წელს - „2021“;
 - 4.1.2. თემის ამსახველ გამოსახულებებს, დეტალებს;
 - 4.1.3. თემის აღმნიშვნელ წარწერებს.
 - 4.2. აღნიშნული სავალდებულო ელემენტების განთავსება შესაძლებელია მონეტის ავერსზე და/ან რევერსზე კონკურსანტის შეხედულებისამებრ.
 - 4.3. კონკურსანტს საკუთარი შეხედულებისამებრ შეუძლია გამოიყენოს:
 - 4.3.1. ლარის სიმბოლო ნომინალთან ერთად - ”5ლ“;
 - 4.3.2. სხვა დამატებითი წარწერები, გამოსახულებები, რეკვიზიტ(ებ)ი, ან დეტალ(ებ)ი, გარდა კონკრეტული პიროვნების (მათ შორის კონკურსანტის) სახელის, გამოსახულების, ემბლემის, ლოგოს, საფირმო ნიშნის ან სხვა ინტელექტუალურ საკუთრებასთან დაკავშირებული კომერციული ორგანიზაციის დასახელების ან/და იდენტიფიკატორისა.
 - 4.4. წარმოდგენილი დიზაინი:
 - 4.4.1. უნდა შეესაბამებოდეს საკონკურსო მონეტების თემას, დანიშნულებას, მახასიათებლებს, იყოს კომპოზიციურად საინტერესო, შინაარსობრივად დატვირთული, მაგრამ ამავე დროს, ვიზუალურად შთამბეჭდავი და ადვილად აღქმადი (*მნიშვნელოვანი*);
 - 4.4.2. ასახავდეს საქართველოს ეროვნული ბანკის მიერ გამოშვებული საკოლექციო მონეტებისაგან განსხვავებულ კონცეფციას (სასურველი);
 - 4.4.3. არ უნდა იყოს ასლი ან მსგავსი სხვა მონეტის დიზაინისა (*მნიშვნელოვანი*).**
 - 4.4.4. შესაძლებელია, შეიცავდეს ფერად დეტალს (*სასურველი*);
 - 4.4.5. უნდა იყოს კონკურსანტის საკუთარი ნამუშევარი (ორიგინალი), ამასთან, დიზაინში სხვა რაიმე სიმბოლოს და/ან დეტალის გამოყენების შემთხვევაში, კონკურსანტის მიერ მითითებული უნდა იქნეს ასეთი სიმბოლოს და/ან დეტალის პირველწყარო (*მნიშვნელოვანი*).
5. ტექნიკური შესრულების მოთხოვნები:
 - 5.1. საკონკურსო ესკიზ(ებ)ი უნდა შესრულდეს A4 ზომის ფორმატზე, როგორც საპრეზენტაციო, ისე მონეტების ორიგინალური ზომებით.

5.2. სასურველია, წარმოდგენილ იქნეს, ასევე, 600 dpi-ზე მეტი რეზოლუციის ელექტრონული/ციფრული ესკიზი TIFF, JPEG ან PNG ფორმატში (დიზაინის მინიმალური გარჩევადობით 1000x1000 პიქსელი), ასევე, ესკიზში გამოყენებული შრიფტი და მისი დასახელება.

6. ესკიზებს თან უნდა ერთვოდეს მონეტის აღწერილობის ტექსტი ამ მუხლის 4.4.5 პუნქტის მოთხოვნის გათვალისწინებით და დიზაინის შინაარსის დეტალური და მკაფიო განმარტება.
7. კონკურსანტს შეუძლია წარმოადგინოს მაქსიმუმ 3 (სამი) განსხვავებული ესკიზი.
8. კონკურსანტმა ეროვნულ ბანკში უნდა წარმოადგინოს ქონებრივად და უფლებრივად უნაკლო ესკიზ(ებ)ი. არცერთ მესამე პირს არ უნდა გააჩნდეს ქონებრივი, უფლებრივი ან ინტელექტუალური მოთხოვნები კონკურსანტის მიერ წარმოდგენილი ესკიზის მიმართ.

მუხლი 2. საკონკურსო ესკიზების საქართველოს ეროვნულ ბანკში წარმოდგენის ფორმა და ვადა

1. კონკურსანტმა საკონკურსო ესკიზები უნდა წარმოადგინოს თანდართული ფორმის (დანართი 1) განაცხადთან ერთად. განაცხადი უნდა შეიცავდეს კონკურსანტის პირად მონაცემებს (კონკურსის დასახელება, ფიზიკური პირის შემთხვევაში კონკურსანტის სახელი, გვარი, ხელმოწერა, მისამართი და საკონტაქტო ტელეფონი, ხოლო იურიდიული პირის შემთხვევაში - საფირმო სახელწოდება, საიდენტიფიკაციო კოდი, ხელმძღვანელი პირის სახელი, გვარი, ხელმოწერა და საკონტაქტო მონაცემები) და თანხმობას/დასტურს საკონკურსო პირობების შესრულებაზე.
2. კონკურსანტმა საკონკურსო მასალა (დიზაინის ესკიზ(ებ)ი, დიზაინის შინაარსის განმარტება და აღწერილობის ტექსტი, განაცხადი) უნდა მოათავსოს ერთ დიდ კონვერტში, რომელზეც უნდა მიუთითოს ადრესატი, ასევე, წარწერა „კონსტიტუციის თემაზე საკოლექციო დანიშნულების 5 ლარის ნომინალის მონეტის დიზაინის საკონკურსო ესკიზი“ და წარმოადგინოს დალუქული სახით შემდეგ მისამართზე: ქ. თბილისი 0114, სანაპიროს ქ. #2 საქართველოს ეროვნული ბანკი.
3. საფოსტო გზავნილების მოძრაობასთან დაკავშირებით მსოფლიოში მიმდინარე ახალი კორონავირუსის (COVID-19) პანდემიით გამოწვეული შეფერხებების გათვალისწინებით, საკონკურსო მასალების წარმოდგენა დასაშვებია ელექტრონული ფოსტის საშუალებით. ამ შემთხვევაში საკონკურსო ესკიზების (დიზაინის შინაარსის განმარტებასთან და აღწერილობის ტექსტთან ერთად) და განაცხადის ელექტრონული ვერსიები უნდა მომზადდეს ცალკე ელექტრონულ ფაილებად (დასაშვებია .pdf, .jpeg ან .png ფორმატით) და გამოიგზავნოს ელექტრონული ფოსტის შემდეგ მისამართზე: coindesign@nbg.gov.ge; სათაურის ველში აუცილებლად უნდა იქნეს მითითებული „კონსტიტუციის თემაზე საკოლექციო მონეტის დიზაინის ესკიზების კონკურსი“.
4. საკონკურსო მასალების მატერიალური ფორმით მიღება იწარმოებს ყოველ სამუშაო დღეს დილის 10:00 საათიდან - 18:00 საათამდე, შემდეგ მისამართზე: ქ. თბილისი 0114, სანაპიროს ქ. #2 საქართველოს ეროვნული ბანკი.
5. საკონკურსო მასალები მიიღება როგორც მატერიალური ისე ელექტრონული ფორმით 2020 წლის 6 აგვისტოდან 10 სექტემბრის ჩათვლით.

მუხლი 3. საკონკურსო ესკიზების განხილვისა და გამარჯვებული ესკიზის გამოვლენის ვადები და პირობები

1. საკონკურსო ესკიზების განხილვა და გამარჯვებული ესკიზის გამოვლენა მოხდება მათი წარმოდგენის ვადის ამოწურვის შემდეგ, არაუგვიანეს ერთი თვის განმავლობაში.
2. საკონკურსო მასალების გახსნა, განხილვა და შეფასება მოხდება შესაბამისი დიზაინის ესკიზების შერჩევის კომისიის მიერ.

3. კომისიის მოთხოვნის შემთხვევაში კონკურსის მონაწილეს შესაძლებელია მოეთხოვოს დამატებითი ინფორმაციის წარმოდგენა. აღნიშნული ინფორმაცია კომისიას უნდა მიეწოდოს მოთხოვნიდან არაუგვიანეს 5 (ხუთი) სამუშაო დღეში.
4. საკონკურსო ესკიზების წარმოდგენის ფორმის დარღვევით და/ან მათი წარმოდგენის ვადის ამოწურვის შემდეგ მიღებული საკონკურსო ესკიზები განხილვას არ ექვემდებარება.
5. ესკიზების შეფასება-შერჩევა მოხდება შემდეგი კრიტერიუმების გათვალისწინებით:
 - 5.1. იდეა;
 - 5.2. კომპოზიციური გადაწყვეტა;
 - 5.3. წარმოდგენილი ესკიზის შესრულების ხარისხი.
6. გამარჯვებული ესკიზის თაობაზე გადაწყვეტილებას მიიღებს საქართველოს ეროვნული ბანკის საბჭო კომისიის მიერ ესკიზების განხილვის შედეგების გათვალისწინებით.
7. საქართველოს ეროვნული ბანკი იტოვებს უფლებას, ნებისმიერ დროს დისკვალიფიკაცია გაუკეთოს კონკურსანტს, თუ:
 - 7.1. კონკურსანტი არღვევს ან სრულად არ აკმაყოფილებს კონკურსის პირობებს და წესებს;
 - 7.2. კონკურსის მიმდინარეობის ან ესკიზების შერჩევის პროცედურების დროს ადგილი ექნება კონკურსანტის არაკეთილსინდისიერ ქმედებას;
 - 7.3. კონკურსანტის მიერ წარმოდგენილი ინფორმაცია აღმოჩნდება მცდარი.
8. საქართველოს ეროვნულ ბანკს არ აქვს ვალდებულება კონკურსანტებს გააცნოს ინფორმაცია კონკურსში მონაწილე ესკიზების მიმართ გაკეთებული შეფასებების შესახებ.

მუხლი 4. გამარჯვებული ესკიზისთვის დაწესებული ჯილდოს ოდენობა და ანაზღაურების პირობები

1. კონკურსში გამარჯვებული ესკიზისთვის (მონეტის ორივე მხარის დიზაინისთვის) განსაზღვრულია ფულადი ჯილდო 4000 (ოთხი ათასი) ლარი (მათ შორის ერთი მხარის დიზაინისთვის - 2000 ლარი) კანონმდებლობით გათვალისწინებული ყველა გადასახადის, მოსაკრებლის და გამარჯვებულის სახელით განხორციელებული საპენსიო შენატანის ჩათვლით.
2. კონკურსში გამარჯვებული ესკიზის ავტორისთვის (კონკურსანტისთვის) აღნიშნული ფულადი ჯილდოს ანაზღაურება მოხდება გადარიცხვით კონკურსანტის მიერ მითითებულ საბანკო ანგარიშზე (ქვეყნის ფარგლებს გარეთ გადარიცხვის შემთხვევაში - შესაბამისი ექვივალენტით უცხოური ვალუტით გადახდის დღეს ოფიციალურად მოქმედი გადაცვლის კურსით) საქართველოს ეროვნული ბანკის ვებ-გვერდზე (www.nbg.gov.ge) კონკურსის შედეგების შესახებ ინფორმაციის გამოქვეყნების შემდეგ გამარჯვებულ კონკურსანტთან ხელშეკრულების (რომლის ძირითადი პირობები მოცემულია დანართი 2-ში) გაფორმებიდან 10 (ათი) სამუშაო დღეში. იმ შემთხვევაში, თუ გამარჯვებული ესკიზი შესრულებულია ერთზე მეტი ავტორის მიერ, აღნიშნული ფულადი ჯილდოს განაწილება მოხდება შესაბამისად, ავტორებთან შეთანხმებით.

მუხლი 5. საკონკურსო ესკიზ(ებ)ის შემდგომი განკარგვის პირობები

1. კონკურსში მონაწილე სხვა ესკიზები დაუბრუნდება კონკურსანტს, მოთხოვნის შემთხვევაში, ხოლო მათი ასლები რჩება ეროვნულ ბანკს.
2. კონკურსში გამარჯვებული ესკიზი ხდება საქართველოს ეროვნული ბანკის საკუთრება ამ ესკიზისთვის განსაზღვრული ჯილდოს ავტორისთვის გაცემისთანავე, რაც გულისხმობს, რომ:

- 2.1. საქართველოს ეროვნულ ბანკს აქვს მონეტის გამოშვების და მისი პოპულარიზაციის მიზნებისათვის მისი შემდგომი გამოყენების და/ან მოდიფიცირების უფლება კონკურსანტთან შეთანხმების გარეშე.
- 2.2. საქართველოს ეროვნული ბანკი თავისუფალია ნებისმიერი ინტელექტუალური საკუთრების ან სხვა საავტორო, მომიჯნავე თუ ნებისმიერი დაკავშირებული უფლებებიდან გამომდინარე მოთხოვნებისა და/ან პასუხისმგებლობისაგან (ასეთის არსებობის შემთხვევაში), იმ შემთხვევაშიც, თუ ამ ესკიზს, მონეტის გამოშვებისა და მისი პოპულარიზაციის მიზნებისათვის, გამოიყენებენ და/ან შეცვლიან საქართველოს ეროვნული ბანკის მიერ საამისოდ უფლებამოსილი პირები, რომლებიც ასევე თავისუფლდებიან ზემოაღნიშნული მოთხოვნებისა და/ან პასუხისმგებლობისაგან.
3. ჩატარებული კონკურსის გამჭვირვალობის მიზნით, საქართველოს ეროვნული ბანკი იტოვებს უფლებას, კონკურსის დასრულების შემდეგ, კონკურსის შედეგებთან ერთად ეროვნული ბანკის ვებ-გვერდზე გამოაქვეყნოს კონკურსში მონაწილე ესკიზები მათი ავტორების სახელების მითითებით.

მუხლი 6. გამარჯვებული ესკიზის ავტორთან ურთიერთობა

კონკურსის დასრულების შემდეგ საქართველოს ეროვნული ბანკის მიმართვის შემთხვევაში გამარჯვებული კონკურსანტი ვალდებულია მონაწილეობა მიიღოს საქართველოს დემოკრატიული რესპუბლიკის პირველი კონსტიტუციის მიღების 100 წლისთავისადმი მიძღვნილი საკოლექციო დანიშნულების 5 ლარის ნომინალის მონეტის დამზადებისას დიზაინის ელემენტების სრულყოფის პროცესში და მოთხოვნის შემთხვევაში ვალდებულია წარმოადგინოს დიზაინის ვექტორული ფაილ(ებ)ი.

მუხლი 7. კონკურსის შედეგების გამოქვეყნების ადგილი და ფორმა

კონკურსის შედეგების შესახებ ინფორმაცია გამოქვეყნდება საქართველოს ეროვნული ბანკის ვებ-გვერდზე საბჭოს მიერ გამარჯვებული ესკიზ(ებ)ის დამტკიცების თაობაზე გადაწყვეტილების მიღებიდან 5 (ხუთი) სამუშაო დღეში. გამარჯვებულ კონკურსანტს კონკურსის შედეგები ეცნობება პირადად.

მუხლი 8. სხვა პირობები:

1. იმ შემთხვევაში, თუ კონკურსის ჩატარების თაობაზე განცხადებაში მითითებულ ვადაში არ იქნა წარმოდგენილი არც ერთი ესკიზი, კონკურსი ითვლება არშემდგარად, ხოლო თუ წარმოდგენილი არც ერთი ესკიზი არ იქნა მოწონებული და შერჩეული ობიექტური მიზეზებით, კონკურსი ითვლება დასრულებულად უარყოფითი შედეგით. ახალი კონკურსის გამოცხადების ან ამ მიზნით სხვა საშუალების ან მეთოდის გამოყენების თაობაზე გადაწყვეტილებას იღებს საქართველოს ეროვნული ბანკის საბჭო.
2. განსაკუთრებულ შემთხვევაში, გამოცხადებული კონკურსის გაუქმება შესაძლებელია მხოლოდ საქართველოს ეროვნული ბანკის საბჭოს გადაწყვეტილებით. გამოცხადებული კონკურსის გაუქმების შესახებ ინფორმაცია გამოქვეყნდება საკონკურსო ესკიზების წარმოდგენისათვის დადგენილი ვადის დასრულებამდე არანაკლებ 5 (ხუთი) კალენდარული დღით ადრე და იმავე საინფორმაციო საშუალებებში, რომლებშიც გამოქვეყნდა კონკურსის ჩატარების შესახებ განცხადება.
3. საკონტაქტო ნომერი დამატებითი ინფორმაციისათვის:
(+99532) 2 406 359 / (+99532) 2 406 471 ელფოსტა: coindesign@nbg.gov.ge

კონკურსანტის მიერ წარმოსადგენი განაცხადის ფორმა

საქართველოს ეროვნულ ბანკს

გ ა ნ ა ც ხ ა დ ი

საქართველოს დემოკრატიული რესპუბლიკის პირველი კონსტიტუციის მიღების 100 წლისთავისადმი მიძღვნილი საკოლექციო დანიშნულების 5 ლარის ნომინალის მონეტის დიზაინის ესკიზის შესარჩევ კონკურსში მონაწილეობის თაობაზე

მე.....
კონკურსანტის სახელი, გვარი (იურიდიული პირის შემთხვევაში - მისი საფირმო სახელწოდება და ხელმძღვანელი პირის სახელი, გვარი)

საქართველოს დემოკრატიული რესპუბლიკის პირველი კონსტიტუციის მიღების 100 წლისთავისადმი მიძღვნილი საკოლექციო დანიშნულების 5 ლარის ნომინალის მონეტის დიზაინის ესკიზის შესარჩევ კონკურსში (შემდგომში - კონკურსი) მონაწილეობით, ვეთანხმები და ვაღიარებ კონკურსის წესებსა და პირობებს და ვადასტურებ, რომ კონკურსში ჩემს მიერ წარმოდგენილი დიზაინის ესკიზის გამარჯვების შემთხვევაში, საქართველოს ეროვნული ბანკის სასარგებლოდ უარს ვამბობ ნებისმიერ ინტელექტუალური საკუთრების ან სხვა საავტორო, მომიჯნავე თუ ნებისმიერი დაკავშირებულ უფლებასა და ასევე ამ უფლებებიდან გამომდინარე ნებისმიერ მოთხოვნაზე, იმ შემთხვევაშიც, თუ ამ ესკიზს, მონეტის გამოშვებისა და მისი პოპულარიზაციის მიზნებისათვის, გამოიყენებენ და/ან შეცვლიან საქართველოს ეროვნული ბანკი და/ან საქართველოს ეროვნული ბანკის მიერ საამისოდ უფლებამოსილი პირები, რომლებიც ასევე თავისუფლდებიან ზემოაღნიშნული მოთხოვნებისა და/ან პასუხისმგებლობისგან.

გამარჯვების შემთხვევაში, მე უარს ვამბობ ჩემი, როგორც მონეტის დიზაინის ესკიზის ავტორის სახელი მიეთითოს დიზაინის ესკიზის ყოველ ეგზემპლარზე ან შემდგომში მისი ნებისმიერი სახით გამოყენებისას.

მე, ქვემოთ ხელმომწერი, ჩემს მიერ წარმოდგენილი დიზაინის ესკიზის კონკურსში გამარჯვების შემთხვევაში, თანხმობას გამოვთქვამ და საქართველოს ეროვნულ ბანკს უფლებას ვაძლევ, გამარჯვებულ დიზაინის ესკიზთან მიმართებაში ჩემი, როგორც მონეტის დიზაინის ესკიზის ავტორის სახელი გამოიყენოს საჯარო გამოსვლებში, განცხადებებში, ვებ გვერდზე თუ ბეჭდვით საშუალებებში გავრცელებულ ინფორმაციაში, სატელევიზიო თუ რადიო განცხადებებში, ასევე ნებისმიერი სხვა ფორმით გაავრცელოს ის.

ჩემთვის ცნობილია და ვადასტურებ, რომ ჩემს მიერ საქართველოს ეროვნულ ბანკში წარმოდგენილი დიზაინის ესკიზში ნებისმიერი სიმბოლოს, დეტალის, ელემენტის და ა.შ. გამოყენებაზე უფლებრივ საკითხებთან დაკავშირებით პასუხისმგებლობა მეკისრება მოქმედი კანონმდებლობის შესაბამისად.

ამასთან ვადასტურებ, რომ ჩემს მიერ წარმოდგენილი ესკიზი (ესკიზები) ქონებრივად და უფლებრივად უნაკლოა და ასეთი ნაკლოვანების აღმოჩენის შემთხვევაში პასუხისმგებლობა მეკისრება მოქმედი კანონმდებლობის შესაბამისად.

ვადასტურებ, რომ თანახმა ვარ, ჩემს მიერ საქართველოს ეროვნულ ბანკში წარმოდგენილი დიზაინის ესკიზის კონკურსში გამარჯვებისა და საქართველოს ეროვნული ბანკის შესაბამისი მოთხოვნის შემთხვევაში მოვახდინო ამ ესკიზის ცვლილება ან მონაწილეობა მივიღო საქართველოს დემოკრატიული რესპუბლიკის პირველი კონსტიტუციის მიღების 100 წლისთავისადმი მიძღვნილი საკოლექციო დანიშნულების 5 ლარის ნომინალის მონეტის დამზადებისას დიზაინის ელემენტების სრულყოფის პროცესში.

ვადასტურებ, რომ თანახმა ვარ, ჩემს მიერ საქართველოს ეროვნულ ბანკში წარმოდგენილი დიზაინის ესკიზის კონკურსში გამარჯვების შემთხვევაში ხელი მოვაწერო „საქართველოს დემოკრატიული რესპუბლიკის პირველი კონსტიტუციის მიღების 100 წლისთავისადმი მიძღვნილი საკოლექციო დანიშნულების 5 ლარის ნომინალის მონეტის დიზაინის ესკიზის შესარჩევი კონკურსის გამარჯვებულისათვის ჯილდოს გადაცემისა და ამ ესკიზთან დაკავშირებით დამატებითი პირობების შესრულების შესახებ“ ხელშეკრულებას ამ კონკურსით გათვალისწინებული პირობების მიხედვით.

ვადასტურებ, რომ თანახმა ვარ, კონკურსის დასრულების შემდეგ, კონკურსის შედეგებთან ერთად ეროვნულმა ბანკმა მის ვებ-გვერდზე გამოაქვეყნოს კონკურსში მონაწილე ჩემი ესკიზ(ებ)ი ავტორის სახელის მითითებით იმ შემთხვევაშიც კი, თუ ეს ესკიზ(ებ)ი არ გამოცხადდება გამარჯვებულად.

კონკურსანტის სახელი და გვარი: _____
(იურიდიული პირის შემთხვევაში - მისი ხელმძღვანელის სახელი და გვარი)

კონკურსანტის პირადი ნომერი: _____
(იურიდიული პირის შემთხვევაში - მისი საფირმო სახელწოდება)
კონკურსანტის საკონტაქტო ტელ: _____ ელ-ფოსტა: _____

თარიღი: _____

კონკურსანტის ხელმოწერა: _____

საქართველოს ეროვნულ ბანკსა და გამარჯვებულ კონკურსანტ(ებ)ს შორის გასაფორმებელი ხელშეკრულების ძირითადი პირობები

საქართველოს დემოკრატიული რესპუბლიკის პირველი კონსტიტუციის მიღების 100 წლისთავისადმი მიძღვნილი საკოლექციო დანიშნულების 5 ლარის ნომინალის მონეტის დიზაინის ესკიზის შესარჩევი კონკურსის გამარჯვებულისათვის ჯილდოს გადაცემისა და ამ ესკიზთან დაკავშირებით დამატებითი პირობების შესრულების შესახებ

მუხლი 1. ხელშეკრულების საგანი

ხელშეკრულების საგანია ეროვნული ბანკის მიერ საქართველოს დემოკრატიული რესპუბლიკის პირველი კონსტიტუციის მიღების 100 წლისთავისადმი მიძღვნილი საკოლექციო დანიშნულების 5 ლარის ნომინალის მონეტის (შემდგომში - მონეტა) დიზაინის ესკიზის (შემდგომში - ესკიზი) შესარჩევი კონკურსში (შემდგომში - კონკურსი) გამარჯვებულისათვის ჯილდოს გადაცემა და ეროვნული ბანკის მოთხოვნის შემთხვევაში, გამარჯვებულის მიერ შესაბამისი ესკიზის დახვეწა-განვითარების პროცესში მონაწილეობა ამ ხელშეკრულების პირობების მიხედვით.

მუხლი 2. მხარეთა უფლებები და ვალდებულებები

1. ეროვნული ბანკი გამარჯვებულს გადასცემს **4000 (ოთხი ათასი) ლარს** კონკურსში გამარჯვებულისათვის ჯილდოს სახით. აღნიშნული თანხა მოიცავს კანონმდებლობით გათვალისწინებულ ყველა გადასახადს, მოსაკრებელს და გამარჯვებულის სახელით განხორციელებულ საპენსიო შენატანს.
2. თანხის გადახდა განხორციელდება ამ ხელშეკრულების ხელმოწერიდან 10 (ათი) სამუშაო დღის ვადაში გამარჯვებულის მიერ მითითებულ საბანკო ანგარიშზე - --- ჩარიცხვით (ქვეყნის ფარგლებს გარეთ გადარიცხვის შემთხვევაში აღნიშნული თანხის გადახდა მოხდება შესაბამისი ექვივალენტით უცხოური ვალუტით გადახდის დღეს ოფიციალურად მოქმედი გადაცვლის კურსით).
3. ეროვნული ბანკი უფლებამოსილია მონეტის გამოშვების და/ან მისი პოპულარიზაციის მიზნით მოახდინოს გამარჯვებულის მიერ წარმოდგენილი ესკიზის შემდგომი გამოყენება და/ან მოდიფიცირება გამარჯვებულთან შეთანხმების გარეშე.
4. ეროვნული ბანკი თავისუფალია ნებისმიერი ინტელექტუალური საკუთრების ან სხვა საავტორო, მომიჯნავე თუ ნებისმიერი დაკავშირებული უფლებებიდან გამომდინარე მოთხოვნებისა და/ან პასუხისმგებლობისაგან (ასეთის არსებობის შემთხვევაში), იმ შემთხვევაშიც, თუ გამარჯვებულ ესკიზს, მონეტის გამოშვების მიზნებისათვის და მისი პოპულარიზაციისათვის გამოიყენებენ და/ან შეცვლიან ეროვნული ბანკის მიერ საამისოდ უფლებამოსილი პირები, რომლებიც ასევე თავისუფლდებიან ზემოაღნიშნული მოთხოვნებისა და/ან პასუხისმგებლობისგან.
5. გამარჯვებული, ამ ხელშეკრულების ხელმოწერით მის მიერ წარმოდგენილ ესკიზთან დაკავშირებით:
 - ა) ეროვნული ბანკის სასარგებლოდ უნარს აცხადებს ნებისმიერ საავტორო, ქონებრივ და მომიჯნავე უფლებაზე, ასეთის არსებობის შემთხვევაშიც ასევე ამ უფლებებიდან გამომდინარე ნებისმიერ უფლებასა თუ მოთხოვნას და გადასცემს მათ ეროვნულ ბანკს ;

- ბ) თანხმობას აცხადებს და აღიარებს, რომ ესკიზზე საავტორო ქონებრივი უფლებების მფლობელია ეროვნული ბანკი;
- გ) უარს აცხადებს უფლებაზე, რომ მისი სახელი, როგორც ესკიზის ავტორისა, მითითებულ იქნეს ესკიზის ყოველ ეგზემპლარზე ან მისი ნებისმიერი სახით გამოქვეყნებისას;
- დ) თანხმობას აცხადებს მისი სახელი და გვარი, გამარჯვებულ ესკიზთან მიმართებაში, ეროვნული ბანკის მიერ გამოყენებული იყოს საჯარო გამოსვლებში, განცხადებებში, ვებგვერდზე თუ ბეჭდვით საშუალებებში გავრცელებულ ინფორმაციაში, სატელევიზიო თუ რადიო განცხადებებში, ასევე, ეროვნული ბანკის შეხედულებისამებრ, ესკიზის ნებისმიერი ფორმით გავრცელების დროს.
6. გამარჯვებული ამ ხელშეკრულების ხელმოწერით ადასტურებს, რომ მას არ გააჩნია და/ან არ შეიძლება გააჩნდეს რაიმე სახის, სახელშეკრულებო ურთიერთობიდან გამომდინარე პრეტენზია ეროვნული ბანკის მიმართ გამარჯვებულის მიერ წარმოდგენილი ესკიზის გამოყენებასთან და/ან მოდიფიცირებასთან დაკავშირებით იმ შემთხვევაშიც კი, თუ ამ ესკიზს, მონეტის გამოშვებისა და მისი პოპულარიზაციის მიზნებისათვის, გამოიყენებს და/ან შეცვლის ეროვნული ბანკი.
 7. „სავტორო და მომიჯნავე უფლებების შესახებ“ საქართველოს კანონის თანახმად, ეროვნული ბანკის მიერ ესკიზის გადამუშავებით შექმნილ ნებისმიერ ობიექტზე სავტორო და ქონებრივი უფლებების მფლობელია ეროვნული ბანკი და გამარჯვებული არ არის უფლებამოსილი ეროვნულ ბანკს პრეტენზიები წარუდგინოს ამ უკანასკნელის მიერ შექმნილ ობიექტთან დაკავშირებით.
 8. გამარჯვებული ადასტურებს, რომ მის მიერ ეროვნულ ბანკში წარმოდგენილ ესკიზში ნებისმიერი სიმბოლოს, დეტალის, ელემენტის და ა.შ. გამოყენებაზე უფლებრივ საკითხებთან დაკავშირებით პასუხისმგებლობა ეკისრება თავად გამარჯვებულს მოქმედი კანონმდებლობის შესაბამისად.
 9. გამარჯვებული ამ ხელშეკრულების ხელმოწერით ადასტურებს, რომ მის მიერ წარმოდგენილი ესკიზ(ებ)ი ქონებრივად და უფლებრივად უნაკლოა და ასეთი ნაკლოვანების აღმოჩენის შემთხვევაში პასუხისმგებლობა ეკისრება თავად გამარჯვებულს მოქმედი კანონმდებლობის შესაბამისად.
 10. გამარჯვებული ვალდებულია:
 - ა) ეროვნული ბანკის მოთხოვნის შემთხვევაში, მონაწილეობა მიიღოს ესკიზის დახვეწა-განვითარებაში და განახორციელოს შესაბამისი სამუშაოები;
 - ბ) ეროვნულ ბანკს, მოთხოვნის შემთხვევაში, გადასცეს ესკიზთან დაკავშირებული ყველა მასალა როგორც მატერიალური, ასევე ელექტრონული ფორმით (მათ შორის ესკიზების ვექტორული ფაილ(ებ)ი);
 - გ) მოთხოვნის შემთხვევაში, ეროვნულ ბანკს გადასცეს ესკიზთან დაკავშირებული ის ინფორმაცია და დოკუმენტაცია, რომელიც საჭიროა ესკიზის დამუშავებისათვის.
 11. ინტელექტუალურ საკუთრებასთან დაკავშირებით ამ მუხლით გათვალისწინებული ვალდებულებები მხარეებისათვის ძალაში რჩება ამ ხელშეკრულების შეწყვეტის შემდეგაც.
 12. გამარჯვებულის მხრიდან ამ ხელშეკრულებით გათვალისწინებული პირობების დარღვევის ან თავისი ვალდებულებების არაჯეროვნად შესრულების შეთხვევაში ეროვნული ბანკი უფლებამოსილია ვადამდე შეწყვიტოს გამარჯვებულთან ურთიერთობა და გამარჯვებულს მოსთხოვოს ვალდებულების შეუსრულებლობით ან არაჯეროვნად შესრულებით გამოწვეული ნებისმიერი ზიანის ანაზღაურება.

მუხლი 3. სხვა დებულებები

1. ეს ხელშეკრულება შედგენილია საქართველოს კანონმდებლობის შესაბამისად. ამ ხელშეკრულების შესრულებისას წამოჭრილი დავა მხარეებმა უნდა გადაჭრან ურთიერთმოლაპარაკების და კონსულტაციების გზით, წინააღმდეგ შემთხვევაში მხარეებს შეუძლიათ მიმართონ სასამართლოს.
2. სასამართლოსათვის მიმართვის შემთხვევაში, საკითხს განიხილავენ საქართველოს სასამართლოები საქართველოს კანონმდებლობის შესაბამისად.
3. ხელშეკრულებაში ცვლილებები და დამატებები ხორციელდება მხარეთა წერილობითი შეთანხმებით, რომელიც ჩაითვლება ხელშეკრულების განუყოფელ ნაწილად.
4. ხელშეკრულება შედგენილია ქართულ ან ინგლისურ (უცხოელი კონკურსანტის შემთხვევაში) ენაზე, თანაბარი იურიდიული ძალის მქონე ორ ეგზემპლარად, აქედან ერთი ეგზემპლარი გადაეცემა გამარჯვებულს, ხოლო ერთი ეგზემპლარი - ეროვნულ ბანკს.
5. ხელშეკრულება ძალაშია მხარეების მიერ ხელმოწერის დღიდან.